

Afera "Pravni fakultet" dobila svoj pravni epilog: 'Apsolutna zastara slučaja!'

Autor: Novi.ba

Objavljeno:21.10.2016 - 14:30

Afera "Pravni fakultet" koja je svojevremeno potresala Bosnu i Hercegovinu dobila je svoj pravni epilog tako što se predmet raspao, nakon krivičnog gonjenja koje se u Kantonalnom sudu u Tuzli vodilo duže od deset godina.

Drugostepena presuda profesoru Pravnog fakulteta Univerziteta u Sarajevu Enesu Durmiševiću nalaže da je nastupila apsolutna zastara, zbog čega je optužba odbijena.

Advokat Almin Dautbegović, koji je u ovom slučaju zastupao Zdravka Lučića, kazao je da u ovom krivičnom postupku nije bilo primjene zakona.



"Imperativ da se iz afere po svaku cijenu osudi bilo ko, stavio je u drugi plan poštivanje procesnog zakona", naveo je za Novi.ba, dodavši da su za prof. Lučića uvaženi svi žalbeni razlozi odbrane.

"Moželi li Kantonalni tužilac zastupati optužbu ako je u istom predmetu bio branilac; da li je pretres UNSA obavljen zakonito; odbrani je onemogućeno izvođenje dokaza, sud je odbio većinu dokaznih prijedloga odbrane; i ključna stvar: svjedokinje nisu dobile imunitet od krivičnog gonjenja ali su u ovom predmetu svjedočile tako što su se samoinkriminirale. Sud nalazi da im se mora dodijeliti savjetnik prilikom svjedočenja - u praksi je to advokat. Raniji iskazi nisu zakoniti", upozorio je dr. Dautbegović, te dodao da je tu bilo i drugih razloga koji se tiču analize činjenica predmeta.

Podsjećamo, profesori Zdravko Lučić i Enes Durmišević su se u optužnici teretili da su počinili nekoliko krivičnih djela, a koji su vezani za slučaj poznat kao seks-afera na Pravnom fakultetu u Sarajevu - Odjeljenje u Tuzli.